

<h>Npogotigiw ni bilisiw</h>

Nsiirin: n y'a da nin na: Npogotigiw ka nyènajè selen, k'u ka t'u kun digi.

Ayiwa... muso dò, a sinamuso sara k'a den to a bolo.

A ye o kè i n'a fò jòn ye a bolo.

O tuma na, npogotigiw taara k'u bè t'u kun digi.

U taara dennin nò fè.

Ba ko, k'a tè taa, ko f'ale ka baara bée ka kè.

O tuma na, a y'i kanto a tonyògònw ma, ko:

- Ayiwa, k'a' ye taa, ko n'aw taara, k'aw bè taa sira min fè, k'aw ka fura kari k'a bila a kan, ko o tuma na, ko ni n tilala, ko ni n taara o sira fè, ko ni n ye fura bilalen ye o kan, ko n na taa o sira fè.

Ayiwa, u wulila.

Npogotigiw taara sira min fè, u ye fura kari k'a bila o sira kan.

Finyè ye o fura talon ka taa o bila bilisiw ka sira kan.

Dennin tilala baara la, dennin ye sira minè.

A taara a sòrò, finyè ye fura talon k'o bila bilisiw ka sira kan.

A taara o sira fè.

A taara o sira fè minkè, a taara a sòrò: sanke b'a la k'a yèrè siri.

A ma fèn fò o la.

O tuma na, a tèmèna.

A sera dugu dò la.

A taara a sòrò kini b'a la k'a yèrè tobi.

Kini y'a nyininka ko:

- Dennin, k'i yèrè bè taa min?

- An ka nyènajè selen, an tonyògònw taara ne nò fè. N ba ma sòn, ko n ka a ka baaraw bée kè fòlò, ko n'o tè ko n tè taa, n y'a fò ko n tonyògònw ka na, ko u ka fura kari k'a bila u taasira kan.

- Ayiwa... taa, héra bè i ye.

Dennin taara, a taara a sòrò kolokuru bilalen bè daga la. Kolokuru y'a nyininka ko:

- Dennin o, i yèrè bè taa min?

<c>3</c>

- An ka nyènajè selen, n tonyògònw taara n nò fè, ko an ka taa an kun digi. N ba sina ma sòn n ka taa. Ne ko u ma, u ka na n nyè, u mana taa sira min fè, u ka fura bila o kan, ko n na na o fura dalen sòrò n nyè.

O ko:

- Taa, héra bè i ye.

Dennin taara se bilisimuso sigilen ma. A ma siran. O y'a nyininka ko:

- Dennin o, k'i yèrè bè taa min?

- An ka nyènajè selen don, n tonyògònw taara n nò fè, ko an ka na an kun digi, nka n ba sina ma sòn n ka na, fò n ka a ka baaraw bée kè. O tuma na ne ko u ma, ko ni u kòròtòlen, k'u ka na, k'u bè taa sira min fè, u ka fura bila o sira kan, ko o tuma na, n na na fura sòrò o sira kan.

A ko:

- Ayiwa, k'i sigi, n k'i kun digi.

A y'i sigi, a ye binyè di a ma. A y'a kun foni, a y'a kun foni.

Bilisimuso gèrèla a la, ka dennin kun digi: sanu den kelen, kunsigi den kelen; o tuma na, a ko npogotiginin ma:

- N bè kelen f'i ye, npogotiginin, ko ne cè taara kungo la, n'a natuma sera, a bè dònkili da, k'i kana siran dè! k'i ka dònkili laminè.

A ko:

- Ayiwa...

Cè na tuma surunyana. Cè y'i to fò fanan jan fè, ka dònkili da ko:

<c>5</c>

<po>Ho, yiri, mètèn, Ho, yiri, mètèn,

Ho, yiri, ha, yiri, mètèn,

Siran tè saya sa, mètèn,

Satuma selen n baden taatuma mètèn!

</po>

O tuma na, bilisimuso ko npogotigi ma:

- A nakan filè, i k'a laminè!

Npogotiginin y'i kan to:

<po>

N kun da, mètèn,

N kun da, mètèn,

N kun da, dako kòrò la, mètèn,

Siran tè saya sa, mètèn...

</po>

O tuma na, bilisikè y'i kan to ko:

- Aa! ko nin tè Fatuma kan ye koyi! ko: nin ye jòni mankan ye tan nin nò?

A seginna ka dònkili da:

Ho, yiri, mètèn, Ho, yiri, mètèn,

Ho, yiri, ha yiri, mètèn,

Siran tè saya sa, mètèn,

Satuma selen n baden taatuma mètèn!

Npogotiginin y'a laminè:

<po>

N kun da, mètèn,

N kun da, mètèn,

N kun da, dako kòrò la, mètèn,

Siran tè saya sa, mètèn...

</po>

<c>7</c>

Bilisikè nana. A y'a dòn k'a bè na surunya, a ye npogotiginin ta k'o bila minan dò kònò k'o sigi ga la. Ayiwa, cè nalen, npogotiginin siranna. A ye nyègèné kè. Cè y'a nyininka ko:

- Hm, Fatuma, mun ji ye a la ka suuru tan dè?!

- E! ne tun ye n ka sègèbagaji sigi ga la, k'o de ji bontò don. A ma nya.

Npogotiginin nana kurukuru ka bin jatigè fè. Fatuma nana npogotiginin ta.

Bilisikè ko:

- A cogo, Fatuma, ko ne m'a fò i ye, ko kabini ne natuma so, maa kasa bè ne nun kòrò?!

Fatuma ye npogotiginin ta ko:

- Npogotiginin nana se ne ma, a k'o ka nyènajè selen don... ko o tonyògònw taara a nò fè, a ko a tonyògònw ma k'u ka na sira fè, ko ni u bè taa sira fè, k'u ka fura bila o kan, finyè ye fura talon, k'o bila an ka sira kan. I y'a dòn, o tè npogotiginin fili ye.

Cè ko a ye:

- O t'a fili ye, ayiwa... A ladon.

A y'a ladon. A y'a kun digi k'o ban: sanu den kelen, kunsigi den kelen, k'a kun bèe bilen sanu na fò k'o digi k'a nyè ni npogotiginin tòw ta ye.

Ayiwa, a ye malokisè kelen ta k'a d'a ma, a k'o tobi. Npogotiginin ye malokisè kelen bila kolon kònò k'o sanpa. Kolon nana fa malokisè kelen

na. A ma fèn fò o la. A ye o bò n'a yèrè ye ka na o kè daga la. O

malokisè kèlen kò k'o kè daga la, daga nana fa nsanya!

A ye kolokuru kòrò dò ta k'a d'a ma, a k'o kè na ye. O ma fèn fò a la. A

ye o bila daga la, o bèe kèra sogobu ye. Npogotiginin ma fèn fò o si ye.

<c>9</c>

Ayiwa... A taatuma so, o nana se. A ko:

- N bè taa n ka so bi!

O ko:

- Ayiwa... o tè baasi ye!

O ye shèfan den saba ta k'a d'a ma. A bòra so dafè, a ye kelen ci. O kèra jònw ye a nò fè. A ye kelen ci, o kèra misiwèrè ye a nò fè. A ye kelen wèrè ci, o kèra dinyènafèn bée ye a nò fè. O tuma na, npogotiginin nana. Kabini npogotiginin kun bòra, tòw bée ko:

- Nin kun nyana, nin kun nyana!

O tuma na, a ba sina denmuso, o ko ale bè a kun diyagoyafoni diyagoya la!
Ba ko:

- Kunkènèfoni man nyin, ko: i kana a foni!

O k'ale b'a foni. A ye kun diyagoya foni. O tuma na, a ye a kun diyagoya foni min kè, a ko, k'ale bè taa a kunda yòrò la. A taara a kundayòrò la. A taara a sòrò, o fura kèlen bè jinèw ka sira kan. A taara o sira fè. A taara a sòrò, sanke bè a la k'a yèrè siri, ko:

- E! kabini Ngala ka n da, n ma nin nyògòn ye fòlò! Sanke ko:

- Ayi, tèmèn ne kan dè! k'e nyògòn caman, u tèmènna ne kan. A taara, a taara a sòrò segi b'a la ka ji bò kòlòn na. A ko:

- E! ayi! ko: a tò kèra koba ye sa!

A ko:

- Tèmèn dè! i nyògòn caman tèmènna ne kan.

A taara a sòrò, bilisimusò yèrè sigilen bè. A kabara o sigilen na. O ko:

<c>10</c>

- Dennin o, k'i nyògònna caman ye ne ye yan koyi! K'i nalen bè mun na dè?

- N nalen bè n kun da.

- Ayiwa... Na gèrè, n b'i kun da.

A ye binyè d'a ma. A ye kun foni. Muso ye a kun jalan naamu ten, a ma sanu da a la, a ka ko kètaw sababu la. O tuma, a y'a kun naamu ten. Muso ko npogotiginin ma:

- Ne nyè b'i la cogo min nò, a ko ne cè taalen bè kungo la, n'a natuma bè se, a bè dònkili da, k'i b'a laminè dè! K'i kana siran dè!

- Ayiwa!

O tuma na, cè na tuma sera, o ye dònkili da:

<po>

Ho, yiri, mèrèn,

Ho, yiri, mèrèn,

Ho, yiri, ha yiri, mèrèn,

Siran tè saya sa, mèrèn,

Satuma selen n baden taatuma mèrèn!

</po>

O tuma na, dennin ye i dade, a ma se ka foyi fò jatigè fè.

Muso ko:

- I k'a laminè sa!

<po>

Ho, yiri, mèrèn,

Ho, yiri, mèrèn,

Ho, yiri, ha yiri, mèrèn,

Siran tè saya sa, mèrèn,

Satuma selen n baden taatuma mèrèn!

</po>

A ko:

- A! bò yen, n ka dònkili da!

<c>12</c>

A y'a da:

<po>

Ho, yiri, mèrèn,

